

दिनांक 15.10.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- जैसलमेर मांय काल एक बस मांय लाय लाग जावण रा हादसा रे कारण मरण वाळां री तादाद बध र 21 व्ही-झुलस्यो 5 जणा री हालत नाजुक ।
- रेलमंत्री अश्विनी वैष्णव रो काल जयपुर ऊं उत्तर-पश्चिम रेलवे रा 65 टेशनां माथे मुसाफिरां सारु सुबीता जनता ने संपण रो कार्यक्रम ।
- अंता उपचुनाव सारु मतदान केन्द्रां ने आसान बणावण रा हुकम- दिव्यांग अर बुजुर्ग मतदातावां ने वोट देवण मांय प्राथमिकता दी जावेला ।
- पूर्व सैनिक कल्याण विभाग री योजनावां रा तैत पैली वाळा फौजियां अर वां रा पिरवार वाळां सारु माली मदद दूणी करण री मंजूरी ।

000

जैसलमेर मांय काल एक गैर-सरकारी बस मांय लाय लाग जावण रे कारण व्हा हादसा ऊं मरण वाळां री तादाद 21 व्हे ग्यी है । हादसा रे कारण झुलस्यो 10 साल रो एक टाबर ईलाज रे दौरान आज संवारे दम तोड़ दीनो । जोधपुर रा महात्मा गांधी अस्पताल मांय भर्ती झुलस्योड़ा पांच जणा री हालत नाजुक बण्योड़ी है । ई बीचे बळ्योड़ी लाशां री ओळखाण सारु जोधपुर अर जैसलमेर रा अस्पताल मांय डीएनए रा नमूना लिया जा रह्या है । अहलकारां रे मुजब मरण वाळा घणखर लोग जैसलमेर, जोधपुर अर आरे-सारे रा हा । जोधपुर रा महात्मा गांधी अस्पताल रा अधीक्षक डॉ. फतेह सिंह भाटी बतायो के लाशां री पिछाण मांय 24 घंटा ताई रो बगत लाग सके है । और ब्यौरो म्हाणा खबरनवीस ऊं-

शिक्षा मंत्री मदन दिलावर आज जोधपुर मांय महात्मा गांधी अस्पताल जा र वठे भर्ती जखमी लोगां रा ईलाज री जाणकारी लीनी । ई पाछे खबरनवीसां सागे बातचीत करता थकां वे कह्यो के हादसा रा कारणां री जांच करी जा रही है अर जांच पाछे ऐड़ा हादसा रोकण सारु जरूरी सगळा जतन कर्या जावेला । ई बीचे हादसा रे कारण मर्या एक जणा रा पिरवार वाळा बस रा मालिक अर बस चलावण वाळा रे खिलाफ जैसलमेर रा सदर थाणा मांय एफआईआर दर्ज कराई है । ध्यान जोग है के काल दोपहरां री बगत जैसलमेर ऊं जोधपुर ओड़ी जा रही एक गैर-सरकारी बस मांय लाय लाग जावण ऊं 19 जणां री मौके ई बळ जावण रे कारण मौत व्हे ग्यी ही ।

000

रेल, सूचना अर प्रसारण अर इलेक्ट्रॉनिकी अर सूचना प्रौद्योगिकी मंत्री अश्विनी वैष्णव रो काल जयपुर रो दौरा करण रो कार्यक्रम है । वे खातीपुरा रेलवे टेशन माथे जयपुर असारवा गाड़ी रा ए.सी. डिब्बा मांय सफर करण वाळां सारु लिनेन कंबल कवर री नुवी व्यवस्था री सरुआत करेला । वे उत्तर-पश्चिम रेलवे रा 65 टेशनां माथे मुसाफिरां रा सुबीता ऊं जुड्या काम जनता ने संपेला । वां रो राजस्थान मैथिल परिषद रा कार्यक्रम मांय शामिल व्हेवण पाछे एक प्रभुद्ध जन सम्मेलन मांय शिरकत करण रो ई कार्यक्रम है । केन्द्रीय मंत्री एक स्कूल मांय आत्मनिर्भर भारत अभियान रा तैत राख्या जावण वाळा कार्यक्रम मांय ई शिरकत करेला ।

000

रेल मंत्री अश्विनी वैष्णव आज नई दिल्ली मांय 16वीं अंतर्राष्ट्रीय रेल उपकरण प्रदर्शनी रो उद्घाटन कीनो । आ दुनिया री दूजी अर एशिया री सब ऊं मोटी रेल प्रदर्शनी है । इण मांय 15 ऊं बत्ता देशां

रा साढे चार सौ ऊं बत्ता लोग अर संस्थान नुवा रेल अर मेट्रो उत्पादां रो दरसाव कर रह्या है। ई मौके श्री वैष्णव कह्यो के रेलों ने और बेहतर बणावण सारू फिलहाल हर साल दो लाख 56 हजार करोड़ रुपया रो निवेश कर्यो जा रह्यो है। वे कह्यो के रेलवे एक खास निर्यात केन्द्र रा तौर ऊं सामी आ रह्यो है अर हाल ई मांय भारत मांय बण्या इंजिन अफ्रीका ने बेची ज्या है।

000

देश भारत रत्न ऊं नवाज़ी ज्या पैली वाळा राष्ट्रपति डॉ. ए. पी. जे. अब्दुल कलाम ने आज वां री जयंती रे मौके सिरधाभाव सागे याद कर रह्यो है। राष्ट्रपति द्रौपदी मुर्मू, उपराष्ट्रपति सी.पी. राधाकृष्णन अर प्रधानमंत्री नरेंद्र मोदी ई वां ने याद कीना। ई मौके सोशल मीडिया रे जरिये संदेश मांय उपराष्ट्रपति राधाकृष्णन डॉ. कलाम ने दूरदर्शी वैज्ञानिक, एक प्रेरक नेता अर सांचा देशभक्त बताया। प्रधानमंत्री नरेन्द्र मोदी ई कह्यो के डॉ. कलाम नौजवानां रा मन मांय नुवी जोत जगायी अर देश ने मोटा सपना देखण री सीख दीनी।

000

राज्य रा मुख्य निर्वाचन अधिकारी नवीन महाजन कह्यो है के अंता विधानसभा हलका मांय व्हेवण वाळा उपचुनाव सारू सगळा मतदान केंद्र हर भांत ऊं सुलभ बणाया जावेला। वे बतायो के सगळा मतदान केन्द्र ग्राउंड फ्लोर माथे बणाया जावेला अर वठै रैंप मुहैया कराया जावेला। दिव्यांग अर बुजुर्गां ने वोट देवण रा काम मांय प्राथमिकता दी जावेला। दृष्टिहीन मतदातावां सारू ब्रेल लिपि वाळी सूचना पर्चियां जारी करी जावेला अर मतदान केन्द्रां माथे ब्रेल डमी बैलेट शीट मुहैया करायी जावेला। दिव्यांग मतदातावां सारू आवण-जावण रो सुबीता ई मुहैया करायो जावेला, ज्यीं सारू वे म्बछम्ब रा सक्षम मॉड्यूल माथे नाम मंडा सके है। ई बीचे उपचुनाव सारू आज दो और पर्चा दाखिल करी ज्या। कांग्रेस रा प्रमोद जैन आज दोबारा पर्चा दाखिल कीनो। इण ऊं पैली राख्यी ज्यी नामांकन रैली मांय पैली वाळा मुख्यमंत्री अशोक गहलोत समेत कांग्रेस रा केई नेता शामिल व्ह्या।

000

रक्षा मंत्री राजनाथ सिंह पूर्व सैनिक कल्याण विभाग कानी ऊं चलायी जा रही योजनावां रा तैत पैली वाळा फौजियां अर वां रा पिरवार वाळां सारू माली मदद सौ फीसदी बधावण री मंजूरी दे दीनी है। गरीबी अनुदान ने प्रति लाभार्थी चार हजार रुपया ऊं बधा र आठ हजार रुपया महीना कर दियो ज्यो है। मंत्रालय रे मुजब दो आश्रित बच्चां सारू भणार्ई-लिखाई बाबत् सब्सिडी एक हजार ऊं बधा र दो हजार रुपया प्रतिमाह प्रति बालक कर दियो ज्यो है। ब्याह सारू अनुदान ई प्रति लाभार्थी 50 हजार रुपया ऊं बधा र एक लाख रुपया कर दियो ज्यो है। अ प्रावधान ई साल एक नवंबर ऊं पेश कर्या जावण वाळी अर्जियां माथे लागू व्हेला।

000

सिरोही जिला रा पिंडवाड़ा मांय समावेशी आजीविका योजना रा तैत राख्यी ज्या कार्यक्रम मांय माली तौर ऊं कमजोर एक हजार महिला प्रधान पिरवारां ने फायदो दियो ज्यो। कार्यक्रम मांय पिंडवाड़ा-आबू रा विधायक समाराम गरासिया पिंडवाड़ा ब्लॉक रा न्यारा-न्यारा एक हजार महिला प्रधान पिरवारां ने मदद रा तौर ऊं 5 हजार 900 रुपया ऊं बत्ती रकम सीधी महिलावां रा खातां मांय भेज्या।

000

आज ग्रामीण महिला अंतर्राष्ट्रीय दिवस मणायो जा रह्यो है। ई मौके डीग रा गांवां री महिलावां राजीविका स्वयं सहायता समूह ऊं जुड़ र वां री माली हालत मजबूत करण रा बारा मांय जाणकारी दीनी। जिला मांय हाल ताई 19 हजार 700 ऊं बत्ती महिलावां लखपति दीदी बण ग्यी है। महिलावां बतायो के लखपति दीदी योजना अर खुद सेवक समूहां सागे जुड़ र वां ने तुलसी री माळा अर थैला बणावण अर सिलाई-बुनाई सरीखा खुद रा काम-धंधा करण सारू सस्ता कर्ज मुहैया करायी ज्या है। ई सागे ई डाटा एंट्री सखी अर बैंक सखी रा तौर ऊं ई सालाना एक लाख रुपया ताई कमा रही है।

अंतर्राष्ट्रीय ग्रामीण महिला दिवस मौके जालौर रा कृषि विज्ञान केन्द्र केशवना मांय संस्थागत प्रशिक्षण शिविर लगायी ज्यो, जिण मांय 32 महिलावां ने सिखावण दीरीजी।

000

कोटपूतली-बहरोड़ ज़िला मांय महिला अर बाल विकास विभाग री ओर ऊं राष्ट्रीय पोषण माह-2025 रा तैत ज़िला स्तर रो कार्यक्रम अर पोषण मेळो राख्यी ज्यो। ज़िला कलेक्टर प्रियंका गोस्वामी **“स्वस्थ नारी सशक्त परिवार”** मुद्दा माथे लगायी ज्यो पोषण मेळा रो उद्घाटन कीनो। वे बतायो के ज़िला रा एक हजार 263 आंगनबाड़ी केंद्रां माथे स्वास्थ्य अर पोषण ऊं जुड़्या मुद्दा माथे न्यारा-न्यारा कार्यक्रम राख्यी ज्यो।